



DONOSTIAKO KIMIKA ZIENTZIEN FAKULTATEKO KALITATE BATZORDEAREN ARAUTEGIA

HITZAURREA

Arautegi honen bidez Euskal Herriko Unibertsitateko Ikastegietako Kalitate Batzordeen Oinarrizko Arautegian zehaztutakoa bete da, eta, beraz, era berean, Europako Unibertsitate Eremuan sartzeko prozesuarekin lotutako zenbait programatan jasotakoa. Zehazki, arautegi hau betetzera dator gradu berrietako ikasketa planetan zehaztutakoa, bertan espresuki adierazten baita ikastegiek Kalitatea Bermatzeko Barne Sistema bat izan behar dutela. Bestalde, AUDIT programaren arabera, Kalitatea Bermatzeko Barne Sistema bat daukaten ikastegietan bertako Kalitate Batzordeak ebaluatu egin beharko du sistema hori. Gainera, 2009ko abenduaren 22an UPV/EHUko Gobernu Kontseiluak onartu zuen UPV/EHUko Irakasleen Irakaskuntza Jarduera Ebaluatzeko «Docentiaz» Programa, eta berori gauzatzeko beharrezkoa da, programaren testuan bertan adierazten den bezala, ikastegietako kalitate batzordeek beren arautegiak izatea.

Kimika Zientzien Fakultateko Kalitate Batzordea Ikastegiko Batzarrak izendatutako batzordea da. Dekanotza taldearekin batera, Kalitatea Bermatzeko Barne Sistemaren plangintza eta jarraipen zereginetan dihardu, eta gainera barne komunikaziorako tresna da kalitate sistema honen politika, helburu, plan, programa, erantzukizun eta lorpenen inguruan. Kalitate Batzordeak, gainera, zuzendaritza taldeari laguntza eta aholkua emango dio tituluen curriculumak garatzeko, gaitasunetan oinarritutako irakaskuntza-ikaskuntza ereduaren arabera. Eredu horretan, metodologia aktiboaren bidez eta informazio eta komunikazio teknologien laguntzaz, ikasleak gidatutako ikaskuntza (banakakoa nahiz taldekoa) sustatuko da, bai eta etengabeko ebaluazioa ere, guztia irakaskuntza eleaniztunaren testuinguruan. Era berean, Kalitate Batzordeak irakasleen ebaluaziorako txostenak egingo ditu.

Ikastegiko Batzarrari dagokio, fakultatearen gobernu eta ordezkaritza kide anitzeko organoa den aldetik, fakultatearen kalitate politika eta helburuak onartzea, bai eta Kalitate Batzordearen eraketa, osaera eta funtzioak onartzea ere. Era berean, Ikastegiko Batzarrari dagokio titulazioetarako proposatzen diren hobekuntza ekintzak onartzea, graduko tituluen kalitatea bermatzeko sistemaren esparruan Kalitate Batzordeak egindako txostenak oinarri hartuta, besteak beste.

1. artikulua.- Arautegiaren helburua.

1.- Arautegi honen helburua da Donostiako Kimika Zientzien Fakultateko Kalitate Batzordearen egitura, osaera eta eginkizunak zehaztea, batzorde hori baita fakultatean ematen den graduko titulurako Kalitatea Bermatzeko Barne Sistemaren (KBBS) ardura duen organoa.

2.- Arautegi honetan biltzen dira UPV/EHUko Ikastegietako Kalitate Batzordearen Oinarrizko Arautegian ezarritako eta nahitaez bete beharreko jarraibideak.

2. artikulua.- Araubide juridikoa.

Hauek dira ikastegiko Kalitate Batzordearen jarduna arautuko dutenak: arautegi hau (Ikastegiko Batzarrak onartua), UPV/EHUko Ikastegietako Kalitate Batzordeen Oinarrizko Arautegia (arautegi honetan aurreikusita ez dagoen guztirako, oinarrizko arautegira joko da) eta dagozkion bestelako arautegiak.



3. artikulua.- Eginkizunak.

1.- Kalitate Batzordeak eginkizun hauek ditu:

- a) Ikastegiko Kalitatea Bermatzeko Barne Sistemaren (KBBS) diseinua, ezarpena, abian jartzea eta jarraipena bultzatzea.
- b) Prozesuei jarraipena egitea dagozkien adierazleen bitartez.
- c) Fakultateko dekanotza taldeari batzordearen proposamenak aurkeztea.
- d) Ikastegiaren urteko helburuak jaso eta, behar denean, haien formulazioa koordinatzea, eta helburuok betetzeko prozesuari jarraipena egitea.
- e) Gogobetetze inkesten emaitzak jasotzea eta haietatik abiatuta hobekuntzak proposatzeko irizpideak ematea.
- f) Urteko jarraipen txostena egitea Kalitatea Bermatzeko Barne Sistemaren azterketa eta berrikuspenetik abiatuta, eta hobekuntza ekintzak proposatzea titulazioan ezarritako helburuak betetzeko.
- g) Titulazioaren akreditazioa lortzen eta aldiro berritzen laguntzea.
- h) Ikastegiko kalitate politika eta helburuen berri emateko tresna izatea, eta helburuok bete daitezen eta unibertsitateko kideen artean zabal daitezen bermatzea.
- i) Titulazioko curriculumak garatzeko plangintza eta haren zehaztapena egiten laguntzea.
- j) Ikastegiko irakasleek gradu berrietako curriculumak hobeto garatzeko tresnak eta metodologiak ikas ditzaten sustatzea.
- k) Fakultateko kideak eta interes taldeak kalitateari eta ebaluazioari buruzko prestakuntza har dezaten bultzatzea.
- l) Ikastegiko zuzendaritzari aholkua ematea Kalitatea Bermatzeko Barne Sistemari dagozkion gaietan.
- m) Ikastegiko Batzarrari bere eskumenen eremuko erabaki proposamenak aurkeztea.

2.- Ikastegiko Batzarrak, dekanotza taldearen proposamenari jarraituz, Kalitate Batzordeari eskuordetu ahal izango dizkio kalitatearekin lotutako eginkizunak, adibidez, Ikastegien Oinarrizko Arautegian, 9.2.i) artikuluan, zehaztutakoa.

4. artikulua.- Osaera.

1.- Kalitate Batzordeak hamaika kide izango ditu, era honetara banatuak:

- a) Berezko kideak:
 - Dekanoa edo hark bere ordez izendatzen duena.
 - Akademia Antolakuntzako dekanordea.
 - Titulazioko koordinatzailea.
- b) Irakasle eta ikertzaileen sei ordezkari: horietako bi Polimeroen Zientzia eta Teknologia sailekoak, beste bi Kimika Aplikatua sailekoak, bat Materialen Fisika sailekoa eta beste bat



Kimika Organikoa I sailekoa. Batzordekideok ikastegiko dekanotza taldeak hautatuko ditu, aipatutako sailen proposamenez. Ahalegina egingo da irakasle eta ikertzaile horiek zuzendaritza edo dekanotza taldeko kideak izan ez daitezen.

c) Administrazio eta zerbitzuetako langileen ordezkari bat, ahal dela kalitatearen arloan arduraren bat daukana.

d) Ikasleen ordezkari bat, ikastegiko Ikasleen Kontseiluak proposatuta.

2.- Batzordeko burua dekanoa izango da, edo bere ordezkari izendatzen duen pertsona. Kalitate Batzordeak berak erabakiko du zein batzordekide izango den batzordeko idazkaria.

3.- Kalitate Batzordeko kideak Ikastegiko Batzarrak izendatuko ditu, dekanotza taldearen proposamenez. Lau urterako izendatuko dira. Ikasleen ordezkaria bi urterako izendatuko da, baina epe hori luzatu ahal izango da.

4.- Kalitate Batzordearen irizpideek eta jardunak jarraipena izan dezaten, kideetako batzuk baino ez dira aldatuko batzordea berritzen den bakoitzean, eta hori bi urterik behin izango da. Dekanotza taldearen ordezkariak eta titulazioko koordinatzailea dekanotza taldea aldatzen denean aldatuko dira; batzordea sortu eta bi urtera, irakasle eta ikertzaileen ordezkarien erdiak eta AZPkoen ordezkaria baino ez dira aldatuko; hau da, lehen batzordea osatzen duten gainerako kideek lau urte emango dute karguan, salbuesenez.

5. artikulua.- Laguntza batzordeak.

1.- Kalitate Batzordeak laguntza batzordeak sortu ahal izango ditu. Laguntza batzordeok Kalitate Batzordearen menpe egongo dira eta aholkua emateko izango dira. Honako hauek zehaztuko dira batzorde bakoitzerako: osaera, batzordeko burua eta idazkaria nortzuk izango diren; jarduera arloa eta eginkizunak; eta, behar izanez gero, bere funtzionamenduaren berezitasunak.

2.- Horrela, Kimikako Gradu Batzordea eratzen da, Kimikako Graduaren curriculuma garatzeaz arduratzeko.

2.1.- Osaera.

Titulazioko batzorde honek dekanoa edo berau ordezkari dezakeen pertsona, buru izango dena, titulazioaren koordinatzailea, mailako lau koordinatzaileak, AZPko kide bat eta, ikastegiko ikasleen kontseiluak proposatuta, irakasle bat ditu osakide. Kalitate batzordeak berak erabakiko du zein batzordekide izango den batzordeko idazkaria.

2.2.- Eginkizunak.

a) Kimikako Graduari jarraipena egitea eta, hala dagokionean, hura hobetzeko neurriak proposatzea Kalitate Batzordeari, horrek Fakultateko Batzarrari aurkeztu eta batzarrak berrets ditzan.

b) Irakaskuntza antolatzeko proposamenak, eskola ordutegiak eta praktiketarako egutegiak aurkeztea, hala dagokionean, Akademia Antolakuntzako dekanordeari.

c) Aholku ematea, hala dagokionean, Kalitate Batzordeari, eskola ordutegi eta egutegietan egin beharreko aldaketan inguruan.

d) Irakasleen irakaskuntzari buruz ikasleei egindako iritzi inkestean emaitzetatik lortutako informazioa aztertzea, eta, behar izanez gero, hobekuntza proposamenak egitea.



e) Kanpoko praktiketan parte hartzen duten guztiei (begirale, tutore eta ikasleek) egindako gogobetetze inkesten emaitzak aztertzea eta Gidaritzapeko Praktiken arduradunari haien berri ematea hobekuntza ekimenak egin ditzan.

f) Kalitate Batzordeari Gradu Amaierako Lanaren inguruko kontu hauek proposatzea:

- Ikasleei eskainitako proiektuen zerrenda.
- Defentsarako ohiko eta ezohiko deialdien egutegia.
- Epaimahaien izendapena.

g) Ikaskuntzaren eta titulatu laneratzearen emaitzen adierazleak aztertzea urtero. Adierazle horiek aztertzeaz gain, beste adierazle batzuk proposatu ahal izango ditu, eta ebaluazio txostena egin.

h) Irakasleen ebaluazio negatiborik balego, zuzenketa ekintzen plana egitea.

i) Beharrezkoa denean, tituluak kentzeko proposamenak prestatu eta Kimika Zientzien Fakultateko Batzarrari aurkeztea.

3.- Era berean, «Docentiaz» laguntza batzordea sortzen da, Irakasleen Irakaskuntza Jarduera Ebaluatzeko Programarako informazio iturria izan dadin. Batzordeak osakide hauek izango ditu: dekanoa edo bere ordezkari izendatzen duen pertsona, batzordeko burua izango dena; sail bakoitzeko edo ikastegiari atxikitako sail atal bakoitzeko ordezkari bat; administrazio eta zerbitzuetako langileen ordezkari bat; eta ikasle bat. Guztiak ikastegiko Kalitate Batzordeko kideak izango dira. Laguntza batzorde honetako kideen izendapena Ikastegiko Batzarrak berretsi beharko du.

6. artikulua.- Funtzionamendu araubidea.

1.- Kide izatea eta leku hutsak betetzea.

Eskolako Batzarreko kideen eginkizunak pertsonalak eta besterenezinak dira; pertsona batek ordezkari izateari utziko dio UPV/EHUko Estatutuetan ezarritako arazoiengatik. Arrazoren bategatik batzordean hutsuneren bat sortuko balitz, ezarritako prozeduraren bidez beteko da.

2.- Eskubideak eta betebeharrak.

Ikastegiko Kalitate Batzordeko kideek batzordearen bileretara joateko eskubidea eta joan beharra daukate, eta arautegi honek betearazten dizkien eginkizunak betetzeko. Bileretara joateak unibertsitateko gainerako betebeharrak betetzetik salbuetsiko ditu organoko kideak, baina organoak beharrezko neurriak hartuko ditu kideak bileretara joan ahal izan daitezen eta aldi berean zerbitzua bete dadin bermatzeko.

3.- Batzordea gutxienez lau hilean behin bilduko da.

4.- Docentiaz batzordeak txostena egin behar badu laguntza batzorde horretako kide diren irakasleek, irakasle horiek ez dira egongo batzordearen bileran beren kasua aztertzen denean.

5.- Batzordearen erabakiak bileran daudenen botoen gehiengoz hartuko dira. Batzordeko buruak kalitateko botoa izango du. Batzordearen erabakiak ez dira nahitaez bete beharrekoak izango, baina ikastegiko zuzendaritzari bidaliko zaizkio beharrezko neurriak har ditzan.

6.- Batzordeko idazkariak akta egin eta Kalitate Batzordeko kide guztiei bidaliko die, eta jendaurrean jarriko du ikastegiko kide guztien esku egon dadin.



7.- Bere araubidean aurreikusita ez dagoen guztian, Kalitate Batzordeak eta sortzen diren laguntza batzordeek jardungo dute Ikastegiko Batzarraren bileretarako ezarrita dauden arauen arabera, aplikagarri zaizkion neurrian.

XEDAPEN GEHIGARRIA

Batzordeetako kideek isilekotasun betebeharra izango dute, batez ere datu pertsonalei dagokienez.

Era berean, batzordeek datu pertsonalen fitxategiak sortu eta erabiltzean men egin beharko diote datu pertsonalak babesteari buruzko arautegiari.

AZKEN XEDAPENA

Arautegi hau indarrean jarriko da Euskal Herriko Agintaritzaren Aldizkarian argitaratzen den egunean.

128 Zenbakia.

EUSKAL HERRIKO AGINTARITZAREN ALDIZKARIA

Asteazkena, 2011eko uztailak 6a.

OHARRA: Fakultateko Batzarrak 5. Artikuluaren 2.1 atala aldatu zuen (2013/04/25) eta aldaketa hori EHAAN argitaratu zen 2013ko Irailak 11ean.